



**Sud Bosne i Hercegovine**  
**Sud Bosne i Hecegovine**

---

**Broj: S1 3 Iž 038201 20 Iž**  
**Sarajevo, 26.10.2020. godine**

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Dinke Bešlagić-Čovrk kao predsjednika vijeća, Srete Crnjak i Vesne Trifunović, kao članova vijeća, odlučujući o žalbi Marka Raos, Luke Raos i Ive Raos, Kuliješ 49, Lepenica, Kiseljak, Bosna i Hercegovina, izjavljenoj na odluku Centralne izborne komisije Bosne i Hercegovine, broj: 05-1-07-1-998/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na nejavnoj sjednici održanoj dana 26.10.2020. godine donio je

**R J E Š E N J E**

**Žalbe se odbijaju.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, podnosiocu žalbe odbijen je upis u izvod iz Centralnog biračkog spiska za glasanje izvan BiH za Lokalne izbore 2020. godine, za ukupno 27.960 birača po prijavama podnesenim do 01.09.2020. godine.

Protiv ove odluke žalitelji su izjavili žalbe, u kojimada su uredno dostavili PRP1 prijavne obrasce, važeće identifikacioni dokumente kao i uvjerenja o državljanstvu BiH. Napominju da se nalaze na redovnom biračkom spisku za općinu Kiseljak na kojoj općini imaju prijavljeno prebivalište. Mole da se žalbe uvažavaju i da im se omogući glasanje putem pošte na predstojećim izborima.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalbe nisu osnovane.

Prema stanju u spisu, Centrala izborna komisija je prije donošenja ožalbene odluke, a prilikom razmatranja prijave žalitelja dostavljenih putem pisarnice Centralne izborne komisije BiH, je utvrdila da su podnosioci žalbe priložili kopije stranih pasoša izdatih u Republici Hrvatskoj pa isti nisu validan identifikacioni dokument u smislu člana 5.12 stav (4) Izbornog zakona BiH te da su se putem internet stranice i info linije Centralne izborne komisije BiH mogli informisati o statusu njihovih prijava za glasanje izvan BiH i na taj način otkloniti nedostatak koji ogleda u činjenici da nisu dostavili validne identifikacione dokumente.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Ovo vijeće konstatuje da je CIK BiH, prije donošenja ožalbene odluke, a kako je već istaknuto, putem svoje web stranice izvjestila žalitelje, da njihove prijave za glasanje izvan BiH sadrže više nedostataka, jer nisu dostavljeni dokazi o identitetu i ostavila im rok da taj nedostatak otklone. Podnosioci žalbe u ostavljenom roku nisu postupili prema obavještenju CIK BiH.

Postupajući na način opisan u prednje utvrđenom činjeničnom stanju podnosioci žalbe su postupili suprotno odredbi člana 3.15 stav (1) Izbornog zakona BiH („Službeni glasnik BiH“ broj 23/01 do 31/16), kojom je propisano da državljanin BiH koji živi u inostranstvu, a ima biračko pravo u skladu sa Zakonom i upisan je u Centralni birački spisak, da bi se nalazio u izvodu iz Centralnog biračkog spiska dužan je da se za svake izbore prijavi CIK BiH. Prijava mora biti zaprimljena u CIK BiH prije roka koji odredi CIK BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju žalitelji nisu uz prijavu dostavili sve potrebne i propisane podatke, tj. validne dokaze o identitetu koji bi potvrdili da su ispunjeni uslovi da se u smislu odredbe člana 5.12 stav (4) Izbornog zakona BiH nađu na izvodu iz Centralnog biračkog spiska za glasanje van BiH. Naime, uz prijave nisu dostavljeni validni dokazi o identitetu, jer se validnim dokazom o identitetu smatra lična karta /osobna iskaznica ili vozačka dozvola ili pasoš/putovnica Bosne i Hercegovine.

Takođe, napomene radi, žaliteljima nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti mogu glasati na redovnom biračkom mjestu u općini u kojoj imaju prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Dinka Bešlagić-Čovrk**